

四庫全書

集部

欽定四庫全書

宋元詩會卷四十

兵部主事陳焯編

朱熹

字元晦一字仲晦司勳吏部郎松之子初學語時父指天示之曰天也熹即問天之上何物松異之就外傳授以孝經讀畢題其上曰不若是非人也從羣兒戲沙上獨端坐用指畫沙視之八卦也年十八貢於鄉紹興戊辰登進士第主泉州同安簿請祠監潭州南嶽廟明年用薦與徐度呂廣問韓元吉同召以疾辭孝宗即位應詔上封事與時相不合除武學博士進密院編修待次乾道五年丁

內艱胡銓用詩人薦以未終喪辭七年九年兩召不起工曰熹安貧守道可嘉也淳熙五年除知南康軍奏復白鹿洞書院明年應詔上疏激切忤旨請祠不報除提舉江西常平公事入對極言時弊上為動容及之任所部肅然上謂王淮曰朱熹政事却可觀也以摘發失權貴意罷歸十四年周必大相起提點江西刑獄入奏上曰久不見卿今當處以清要翌日除兵部郎官引足疾丐祠為侍郎林栗所糾仍舊職提刑江西再召因投匭進封事上已就寢乃起秉燭讀之明日除主管太乙宮兼崇政殿說書力辭奉祠光宗即位除知漳州自劾罷寧宗立趙汝愚首薦熹及陳傅良擢煥章閣待制侍講力辭不允每編次所講成帙以進上亦開懷容納會韓侂胄用事熹約吏侍彭龜年共論之而熹不得立於朝矣沈繼祖余熹先後誣以大罪至乞斬熹於是攻偽學日急乃熹日與諸生講學

曾不少休慶元五年請致仕明年卒年七十一謚
曰文理宗朝贈太師追封信國公改徽國淳祐元
年從祀孔子廟廷

遠遊篇

舉坐且停酒聽我歌遠遊遠遊何所至咫尺視九州九
州何茫茫環海以為壘上有孤鳳翔下有神駒驤孰能
不憚遠為我遊其方為子奉尊酒擊鉢歌慨慷送子臨
大路寒日為無光悲風來遠壑執手空徊徨問子何所
之行矣戒關梁世路百艱難出門始憂傷東征憂曠谷

西遊畏羊腸南轅犯癘毒北駕風裂裳願子馳堅車躡
險摧其剛戕我既不支瑣瑣誰能當朝登南極道暮宿
臨太行睥睨即萬里超忽凌八荒無為蹙蹙者終日守
空堂

擬古 六首

離離原上樹戢戢澗中蒲娟娟東家子鬱鬱方幽居濯
濯明月姿靡靡朝華敷昔為春蘭芳今為秋薜蘿寸心
未銷歇託體思同車

綺閣百餘尺朝霞冠其端飛欄麗遠漢曲楹何盤桓清
謠發徽音一唱再三歎借問誰為此佳人本邯鄲微響
激流風浮雲慘將寒為言何所悲遊子在河關不恨久
離濶但憂芳歲闌願為清宵夢燕昵窮餘歡

上山採薇蕨側徑多幽蘭采之不盈握欲寄道里艱沈
憂念故人長夜何漫漫芳馨坐銷歇徘徊以悲歎

佳月朗秋夜蟋蟀鳴空堂大火西北流河漢未渠央野
草不復滋白露結為霜梁燕起高飛雲雁亦南翔念我

同心子音形阻一方不念執手歡隔我如參商寓龍不
為澤畫餅難充腸金石徒自堅虛名真可傷

高樓一何高俯瞰窮山河秋風一夕至憔悴已復多寒
暑遞推遷歲月如頽波離騷感遲暮惜誓閔蹉跎放意
極驩虞咄此可奈何邯鄲多名姬素艷凌朝華妖歌掩
齊右緩舞傾陽阿徘徊起梁塵綵紛衣羅麗服乘奇
芬顧我長咨嗟願生喬木陰黃緣若絲羅

夫君滄海至贈我一篋珠誰言君行近南北萬里餘結

作同心花綴在紅羅襦雙垂合歡帶麗服眷微軀為君
一起舞君情定何如

友人黃子衡欲之上庠以詩留行

若士有奇操久壓山林卑奮衣千里道已與親友辭子
行何悠悠世路方如茲歸來亦何日車馬光陸離幽蘭
生前林擢置白玉墀不以芳意遠結根終不移願子崇
明德潛躍貴因時悲風靜夜聽喬木歲寒姿何以迴軒
駕千載相與期

古意

兔絲附樸椒桂樹生高岡弱蔓失所依佳木徒蒼蒼兩
美不同根高下永相望相望無窮期相思諒徒為同車
在夢想忽覺淚沾衣不恨歲月邁但惜芳華安嚴霜委
百草坐恐及茲時盛年無再至已矣不復疑

春日言懷

春至草木變郊園猶掩扉茲晨與心會覽物徧芳菲桃
萼破淺紅時禽悅朝暉泉谷暖方融原田水初肥東作

興庶忙歲功始在茲端居適自慰世事復有期終然心
所向農畝當還歸

酬祕閣張文簡寂之篇

勞農會稽宅息駕丹元鄉丹元不可見翠壁空雲房是
時中春月暄風發新陽白水注幽壑綠樹敷崇岡俯聽
足怡悅仰觀共徜徉班坐得瑤草傾壺得瓊漿長吟遊
仙詩亂以招隱章忽忽林景西躊躇申慨慷坐上江湖
客兀傲鬚眉蒼逸氣邁霄漢英詞吐琳琅思與泉石勝

韻隨笙鶴翔追遊不敢及咏歎可能忘

秋懷

懷疴坐竟日晚色散幽樹寂歷候蟲悲沆瀣碧草露端
居興方淡沈默自成趣羽觴歡獨持瑤琴誰與晤空知
玄思清未惜年華度美人殊不來歲月空遲暮

賦歸雲洞

人生信多患吾道初不窮云何感慨士伏死堪巖中宜
陽古道周竅石何嵌空窮幽歷肺腑履坦開房櫳頗疑

有畸人往昔寄此宮歲月詎云幾井竈無遺蹤我來記
清秋歸途渺窮冬興懷重幽討永嘯回長風風回雲氣
歸洞口春濛濛信美非人境出門吾欲東

宿黃沙以上如翠浪湧分韻得如字

日中秣吾馬日暮膏吾車崎嶇陟南嶺浩蕩凌八區夜
雨薦峰前朝登碧琳墟蒼茫永歎罷翕忽清景徂去此
二三子我行將何如崔嵬正丘垤萬里思南圖

釋奠齋居

理事未逾月簿書終日親簡編不及顧几閣積埃塵今
辰屬齋居煩跼一舒伸瞻眺庭宇肅仰首但秋旻茂樹
禽囀幽忽如西澗濱聊參物外趣豈與俗子羣

寄題金元貞長泰面山亭

抗心塵境外結宇臨秋山乘高一騁望表裏窮遐觀衆
嶠互攢列連岡莽縈環陽崖煙景舒陰壑悲風寒碧草
晚未凋林薄已復丹仙人羨門子歲晚當來還

還家即事

獻歲事行役徂春始言歸昔往草未芳今來翠成幃扶
疎滿園陰時禽互翻飛叢萱亦已秀丹葩耀晨輝即事
誰與娛淹留自忘機日暮復出門悵然心事違古人不
可見獨掩荒園扉

和林懌之黃雲之句兼簡同遊諸兄

登覽日云晏歸車眇重岡天風振余旃夕露沾我裳數
子情未厭春山杳茫茫還瞻長江白迴眺飛雲黃當念
塵中友心期邈相望無為跨鴻鵠決起凌青蒼

宿石岳館

春江日東注我行遡其波揚帆指西溼兩岸青山多青
山自逶迤飛石空嵯峨綠樹生其間幽鳥鳴相和塞蓬
騁遐眺擊楫成幽歌獨語無人晤茲懷竟如何

過武夷作

弄舟緣碧澗棲集靈峰阿夏木紛已成流泉注驚波雲
關啟茫茫高城鬱嵯峨眷言羽衣子俛仰日婆娑不學
飛仙術累累丘塚多

齋居聞磬

幽林滴露稀華月流空爽獨士守寒棲高齋絕羣想此
時隣磬發聲合前山響起對玉書文誰知道機長

川上見月歸示同行者

川上偶攜手皓月起林端一舒臨流望玄露已先溥歸
掩荒園扉更怯衣裳單清夜誰晤言獨處難為歡

同安官舍夜作

官署夜方寂幽林生月初閒居秋意遠花香寒露濡故

國異時節欲歸懷簡書聊從西軒卧塵思一蕭疎

秋蘭已悴以其根歸學古

秋至百草晦寂莫寒露滋蘭皋一以悴蕪穢不能治端
居念離索無物遺所思願言託孤根歲晏以為期

雪亭

危亭竹栢間峭蒨日幽絕朔風一以厲愛此枝上雪仰
悲玄景駛俯歎羣芳歇不用此時來那知歲寒節

客舍聽雨

沈沈蒼山郭暮景寒餘青春靄起林際滿空寒雨生投
裝卽虛館簷響通夕鳴遙想山齋夜蕭蕭木葉聲

月夜述懷

皓月出林表照此秋牀單幽人起晤歎桂香發窗間高
梧滴露鳴散髮天風寒抗志絕塵氛何不棲空山

齋居感興

七首

涇舟膠楚澤周網已陵夷况復王風降故宮黍離離至
聖作春秋哀傷實在茲祥麟一以踣反袂空漣漣漂淪

又百年僭侯荷爵珪王章久已喪何復嗟歎為馬公述
孔業託始有餘悲拳拳信忠厚無乃迷先幾

東京失其御刑臣弄大綱西園植姦穢五族沈忠良青
青千里草乘時起陸梁當塗轉凶悖炎精遂無光桓桓
左將軍仗鉞西南疆伏龍一奮躍鳳雛亦飛翔祀漢配
彼天出師驚四方天意竟莫回王圖不偏昌晉史自帝
魏後賢盍更張世無魯連子千載徒悲傷

晉陽啟唐祚王明紹巢封垂統已如此繼體宜昏風塵

聚瀆天倫北宸司禍凶乾綱一以墜天樞遂崇崇淫毒
穢宸極虐焰燔蒼穹向非狄張徒誰辦取日功云何歐
陽子秉筆迷至公唐經亂周紀凡例孰此容侃侃范太
史受說伊川翁春秋二三策萬古開羣蒙

放勛始欽明南面亦恭己大哉精一傳萬世立人紀猗
歟歎日躋穆穆歌敬止戒癸光武烈待旦起周禮恭惟
千載心秋月照寒水魯叟何常師刪述存聖軌

飄飄學仙侶遺世在雲山盜啟元命祕竊當生死關金

鼎蟠龍虎三年養神丹
刀圭一入口
白日生羽翰
我欲往從之
脫屣諒非難
但恐逆大道
偷生詎能安

西方論緣業
卑卑喻羣愚
流傳世代久
梯接凌空虛
顧盼指心性
名言超有無
捷徑一以開
靡然世爭趨
號空不踐實
躡彼榛棘途
誰哉繼三聖
為我焚其書

卜居

卜居屏山下
俯仰三十秋
終然村墟迴
未愜心期幽
近聞西山西
深谷開平疇
茆茨十數家
清川可行舟
風俗

頗淳樸曠土非難求誓捐三徑資往遂一壑謀伐木南山顛結廬北山頭耕田東溪岸濯足西水流朋來即共懽客去成孤遊靜有山水樂而無身世憂著書俟來哲補過希前修茲焉畢暮景何必營菟裘

白鹿洞書院

在郡城東北十五里事見記文

昔人讀書地町疇白鹿場世道有升降茲焉更表章矧今中興年治具一以張絃歌獨不嗣山水無輝光荒榛適剪除聖謨已汪洋亦有皇華使肯來登此堂問俗良

懇惻懷賢增慨慷雅歌有餘韻絕學何能忘

開先漱玉亭

在萬杉西二里亭舊在橋上今廢

奇哉康山陽雙劍屹對起上有橫飛雲下有瀑布水崩
騰復璀璨佳麗更雄偉勢從三梁外影落明湖裏平生
兩仙句詠嘆深仰止三年落星灣悵望眼空眯今朝隨
杖屨得此弄清泚更誦玉虹篇塵襟諒昭洗

簡寂觀

在開先西五里陸修靜所居

高士昔遺世築室蒼崖陰朝真石壇峻煉藥古井深結

交五柳翁屢賞無絃琴相攜白蓮渚一笑傾夙心晚歲

更市朝故山鎖雲岑柴車竟不返鸞鶴空遺音

修靜晚為宋明

帝召至建康卒于崇虛館

我來千載餘舊事不可尋四顧但絕壁苦

竹寒蕭摻

相傳竹是修靜手植其萌即所謂甜苦筍者

歸宗寺

在簡寂西十里

金輪紫霄上寶界鸞溪邊往昔王內史願香有餘煙

相傳

寺是王右軍故宅

千年今一歸景物還依然澗水既蕩潏山花

亦清妍不辭原隰勞樂此賓從賢訪古共紆鬱勞農獨

勤拳憐我乖勝踐裂牋寄真詮逃禪公勿遽且畢區中緣

康王谷水簾

谷口景德觀在溫湯西十五里入谷又十五里至簾下

循山西北驚崎嶇幾經丘前行荒蹊斷豁見清溪流一
涉臺殿古再涉川原幽縈紆復屢渡乃得寒巖陬飛泉
天上來一落散不收披崖日璀璨噴壑風颼颼追新纍
絕品淪茗澆窮愁敬酌古陸子何年復來遊

以上五首俱同尤延

之提
舉作

遊天池

三年落星渚北望天池山臨風幾浩歎欲往無飛翰今
朝復何朝陟此青雲端高尋已竒絕俯瞰何其寬西窮
濂溪源東盡湓城關渺然滄波外淮山碧連環我意殊
未極更思出塵寰何當駕輕鴻八表須臾間視此長江
水滔滔儼西還

題霜傑集

先生人物魏晉間題詩便欲傾天慳向來無地識眉宇

今日天遣窺波瀾平生尚友陶彭澤未肯輕為折腰客
胸中合處不作難霜下風姿自竒特小儒閱閱金匱書
不滯周南滯海隅枌榆連陰一見晚何當挽袖凌空虛

秋夜歎

秋風淅瀝鳴清商秋草未死啼寒蟬幽人夜半起晤歎
仰視河漢天中央河漢西流去不息人生辛苦何終極
蒼山萬疊雲氣深去鍊形魂生羽翼

壽母生朝

秋風蕭爽天氣涼此日何日升斯堂堂中老人壽而康
紅顏綠鬢雙瞳方家貧兒癡但深藏五年不出門庭荒
竈陘十日九不煬豈辦甘脆陳壺觴低頭包羞汗如漿
老人此心久已忘一笑謂汝庸何傷人間榮耀豈可常
惟有道義思無疆勉礪汝節彌堅剛熹前再拜謝阿娘
自古作善天降祥但願年年似今日老萊母子俱徜徉
小集梵天寺坐間雨作已復開霽步至東橋玩月
傑閣翔林杪披襟此日閒層雲生薄晚涼雨徧空山地

迴衣裳冷天高澄霽還出門迷所適月色滿林關

梵天觀雨

持身乏古節寸祿久棲遲
整寄靈山寺空吟招隱詩
讀書清磬外看雨暮鐘時
漸喜涼秋近滄洲去有期

十五日再登祝融用臺字韻

江流圍玉界天影抱瓊臺
拄杖煙霄外中巖日月回
箕山藏遁許吳市隱仙梅
一笑今何在相期再舉杯

安仁曉行

夙駕安仁道行行得自娛荒山圍野濶遠樹出林孤景
晦長煙合天寒碧草枯歸心懷往路極目尚平蕪

宿休菴用德功壁間韻贈陳道人

暮入千峰裏寒棲一草菴室連丹竈煖厨引石泉甘塵
慮紛難到神光耿内含非君有道氣孤絕詎能堪

晚望

禾黍彌平野淒涼故國秋清霜凝碧樹落日翳層丘覽
物知時變為農覺歲邁不堪從吏役憔悴欲歸休

安溪書事

清溪流不極夕霧起嵐陰虛邑帶寒水悲風號遠林涵
山日欲晦窺閣景方沈極目無遺眺空令愁寸心

梅花開盡不及吟賞感歎成詩

憶昔身無事尋梅只怕遲沈吟窺老樹取次折橫枝絕
艷驚衰鬢餘芳入小詩今年何草草政爾負幽期

即事有懷寄彥輔仲宗二兄

一水方涵碧千林已變紅農收爭暖日老病怯高風徙

倚非無計心期莫與同
向來歡會處離合太怱怱

酬知府府判二丈

志士懷韜略奇兵吼鎬干
關河那得往肝膽不勝寒壯
節悲如許雄圖渺未闡
皇輿方仄席陋巷敢求安

登定王臺

寂寞番君後光華帝子來
千年餘故國萬事只空臺
日月東西見湖山表裏開
從知爽鳩樂莫作雍門哀

和題呂少衛教授藏書閣

西樓誰與共閒居茂樹婆娑清晝餘大隱祇今同一壑
行吟非昔似三閭揣摩心事惟黃卷料理家傳亦素書
更鑿寒泉供漱石世紛寧擬問焉如

數日前與判院丈有宋村之約雪中有懷奉呈

雲垂天濶歲將闌一室翛然獨掩關擁褐不知風折木
開軒惟見雪漫山玄空杳靄低迷外碧樹璵璠掩映間
吟罷左思招隱句扁舟無路過長灣

舫齋

扁舟容與小房櫳
搖颺簾旌蜀錦紅
兩岸蒹葭秋色裏
一川煙浪夕陽中
漫愁艷潏雙蓬鬢
未怯江湖萬里風
築室水中聊爾爾
何須極浦望朱宮

秋香徑

此首與晚蔬園共六詩皆和劉秀野雜詠

門外黃塵沒九達
坊中叢桂長樛枝
三秋冷蕊從開落
終歲清陰不改移
幽徑祇愁空翠滴
濃香一任晚風吹
攀援却恨王孫遠
惆悵千林欲暮時

雪後

惆悵江村幾樹梅杖藜行遶去還來前時雪壓無尋處
昨夜月明依舊開折寄遙憐人似玉相思應恨劫成灰
沈吟日落寒鴉起却望柴荆獨自回

和張彥甫看雪樓賢

夜來春雪徧林丘却喜風威曉便收
好上籃輿閒縱目休將衲被苦蒙頭
微官正愧逍遙社勝日猶堪汗漫遊
欲出林闌戀瑤草不妨樽酒更淹留

晚蔬園

未覺閒來歲月頻
荷鉏方喜土膏勻
連畦已放瑤簪露
覆地行看玉本新
小摘登盤先餉客
晚炊當肉更宜人
却憐寂寞公儀子
拔盡園蔬不歎貧

次秀野韻

史君簾閣對脩筠
起看名園雨後春
便賦新詩留野客
更傾芳酒酌花神
未酬管樂平生志
且作羲皇以上人
祇恐功名相迫逐
不容老子卧漳濱

次韻詠雪

二首

一夜同雲匝四山曉來千里共漫漫不應琪樹猶含凍
翻笑楊花許耐寒乘興正須披鶴氅淪甘猶喜破龍團
無端酒思催吟筆却恐長鯨吸海乾

開門驚怪雪交加亂落橫飛詎有涯密竹不妨呈勁節
早梅何處覓殘花山陰客子須乘興洛下先生想卧家
病廢杯觴寒至骨哦詩無復更豪誇

奉和某侍郎使君唱酬西湖作

越王城下水融融此樂從今與衆同滿眼菱荷方永日

轉頭禾黍便西風湖光盡處天容濶潮信來時海氣通
酬唱不誇風物好一心憂國願年豐

蒙恩許遂休致陳昭遠文以詩見賀已和答之復

賦一首

闌干苒苒久空槃未覺清羸帶眼寬老去光華姝黨藉
向來羞辱侍臣冠極知此道無終否且喜閒身得暫安
漢祚中天那可料明年大歲又泥灘

寄雲谷瑞泉菴主

憶昔誅節日山房我自名風埃猶俗累煙雨負巖耕多
謝空門侶能同物外情肯來分半壑聊爾度平生少待
清秋日閒尋遠嶽盟不知誰是客一笑絕塵纓

采菱舟

湖平湖水碧桂櫂木蘭舟一曲菱歌晚驚飛欲下鷗
祝孝友作枕屏小景以霜餘茂樹名之

山寒夕飈急木落洞庭波幾疊雲屏好一生秋夢多

示西林可師

身世年來欲兩忘一春隨意住僧房
行逢舊隱低回久
綠樹鶯啼清晝長

入瑞巖道間得四絕句呈彥集克父二兄

清溪流過碧山頭
空水澄鮮一色秋
隔斷紅塵三十里
白雲黃葉兩悠悠

山茶

江南池館壓深紅
零落荒煙細雨中
却是北人知愛惜
數枝和雪上屏風

秋日

一雨生涼杜若洲月波微漾綠溪流
茆簷歸去無塵土
淡薄閒花遶舍秋

梅

姑射仙人冰雪容塵心已共彩雲空
年年一笑相逢處
長在愁煙苦霧中

呂祖謙

字伯恭尚書右丞好問之孫也自其祖始居婺州
祖謙學本家庭有中原文獻之傳長交張栻朱熹

講索益精初蔭補入官後舉進士復中博學宏詞
科除太學博士歷國史院編修實錄院檢討輪對
勉孝宗留意聖學且言恢拓大事久之遷著作郎
以未疾請祠歸先是書肆有書曰聖宋文海學士
周必大請委館職擇取以成一代之書孝宗因命
祖謙斷自南渡以前類為百五十卷賜名文鑑進
秩直祕閣明年除著作郎兼國
史院編修卒年四十五謚曰成

送宋子華通判長沙

騷人故悲秋九辨播三楚宋公舊題壁文彩照潭府千
載得君侯遙遙接華緒還當初秋天又進湖湘櫓當家
多勝事此役可兼取江山日日新一若相勞苦木脫獻

羣峰雲生失前浦
況持別乘權光華
動徒旅元戎下分
庭百史羣趨廡
後車載仁風習習
被南土預知潢池
盜無復驚枹鼓
政當勸賣劍不必
禁挾弩入獻有訐
謨論賞駢圭組
臨分一杯酒不為
離愁舉

野步

石梁俯清流苔髮
明可數茆簷春晝
長寂寂亭陰午鳥
啼花徑深風絮浩
無主幽人不可覲
棋聲時出戶

寄章冠之

章侯平生一詩囊
酬風酢月徧四方
浩歌姑孰酒淋浪
醉呼太白同舉觴
遂登浮玉臨渺茫
江濤挾筆益怒張
沙頭倚檣樂未央
興闌忽上秋浦航
門前槐花日夜黃
閉門琢詩聲繞梁
白袍紛紛渠自忙
飄然邂逅非所望
自言久厭世鎖韁
合眼已夢廬山蒼
君才甚碩氣方剛
身雖欲隱文則彰
江湖故人半朝行
左推右挽摩天翔
而我戢翼甘摧藏
不能與俗相迎將
徑當行前掃山房
俟君功成還故鄉
却駕柴車迎路旁

方齋行

世皆尚圓君獨方富貴可取君不忙閉門讀書聲琅琅
舊書重疊堆在牀點勘同異分邊旁運精竭思心力彊
十年足不離僧房荒山野路秋水長客雖欲至嫌路妨
幽蘭無人為君芳采菊落英充餽糧客即不來有餘香

題歸庵

雲壁開蒼峽風林卷翠濤諸松皆老大一嶂獨孤高發
興雖公等尋幽許我曹秋光端可賦不是楚人騷

城樓

城峻先迎月，簾疎不隔風。
棋聲傳下界，雁影沒長空。
島嶼秋光裏，樓臺海氣中。
登臨故待晚，雨外夕陽紅。

蘇仁仲計議挽章

幽棲略具便休官，帝遣蒲輪喚不還。
大似文元居道院，又如白傅過香山。
夢回帷幄青冥上，醉墮風波浩蕩間。
向使胸中有榮辱，那能八十鬢毛斑。

賀車駕幸祕書省

麟臺高柳識雕輿共記中興幸省初黃道再傳天子蹕
青編重入史臣書需雲下際君恩盛晨露高張樂節舒
若寫鴻猷叅大雅定非周鼓頌田漁

春日 二首

短短菰蒲綠未齊汀洲水暖雁行低柳陰小艇無人管
自送流花下別溪

簷鐸無聲鳥語稀徑深鐘梵出花遲日斜徧遶谿南寺
未信東風屬酒旗

陳亮

字同甫婺州永康人生而目光有芒為人才氣超邁喜談兵論議風生下筆數千言立就隆興初婺州方以解頭薦因上中興五論奏入不報退修力學者十年淳熙五年亮更名同詣闕上書近萬言孝宗赫然震動欲榜諸朝堂以厲羣臣將用种放故事擢用之諸大臣惡其直言無諱百端交沮亮亟渡江而歸落魄酒戲為大言讐家挾告屢繫獄瀕死得免光宗立策進士問以禮樂刑政之要亮對策獨當上意親擢第一既知為亮則大喜時孝宗在南內寧宗在東宮聞知皆喜授簽書建康府判官廳公事未至官一夕卒

謫仙歌

有序

清夜獨坐天地無聲星斗動搖欣觀李白集高吟數
篇皆古今不經人道語騷章逸句洒然無留思寥寥
數百年間揚鞭獨步吾所起敬起慕者太白一人而
已感歎久之恨無人能繼太白後因成謫仙歌用以
祝太白舉觴以酬太白太白有靈其聽我聲知我意
矣

太白字太白清風肺腑明月魄揚鞭獨步止一人我誦
太白手屢拍嘗聞太白長庚星夜半星在天上明仰天

高聲叫李白星邊不見白應聲又疑白星是酒星銀河
釀酒天上傾奈無兩翅飛見白王母池邊任解醒欲遊
金陵自采石翫月乘舟歸赤壁欲上箕山首陽巔看白
餐雪水底眠紫煙又不知在何處漱瑤泉酌霞盃悵望
不見騎鶴來白也如今安在哉我生恨不與同時死猶
喜得見其詩豈特文章惟足法凜凜氣節安可移金鑾
殿上一篇頌沈香亭裏行樂詞此特太白細事耳他人
所知吾亦知脫鞵奴使高力士辭官妾視楊貴妃此真

太白大節處他人不知吾亦知歌其什鬼神泣解使青
塚枯骨立呼其名鬼神驚惟有羣仙側耳聽我今去取
崑山玉將白儀刑好彫琢四方上下常相隨江東渭北
休興思會須乞我乾坤造化兒使我筆下光焰萬丈長
虹飛

廷對應制

天朝銳意急英賢
瀕洞邊塵七十年
際遇風雲凡事別
積功日月壯心愆
管簫器小誰能識
孔孟人存用則傳

慚負壽皇勤教育奏篇半徹冕旒前

及第謝恩和御賜詩韻

雲漢昭回倬錦章爛然衣被九天光已將德雨平分布
更挹仁風與奉揚治道修明當正宁皇威震疊到遐方
復讐自是平生志勿謂儒臣鬢髮蒼

陸九淵

字子靜金谿人與兄九齡皆乾道間進士九齡官
止教授九淵由崇安主簿用薦除國子正歷管台
州崇道觀擢知荆門軍紹熙三年十二月卒年五
十四子靜言道先德性而後問學鵝湖之辯始與

朱熹與晚年究歸於同然不事詞章無可傳之詩
惟采象山一篇存其意致而已象山屬貴溪子靜
結廬其工學者
遂稱象山先生

象山

我家應天山山高數百丈上開園池美林壑千萬狀西
山有龍虎煙霞耿相望寒清漾微波暖翠圍層嶂天光
入行舟野色隨支杖吾黨二三子幽賞窮清曠引興谷
雲邊題名巖石上碧桃吹曉笙玄鶴驚春帳一笑咏而
歸千載應可尚

陸九韶

號梭山九淵之兄子美其字也按宣教郎陸賀世居金谿延福鄉青田里生六子長九思次九韶次九皋次九齡次九叙又次九淵惟淵與齡齊名而韶詩亦多佳句

玉兔泉

玉兔愛佳水飲之化為石規圓立山趾皎潔凌皓魄應厭舊經躔盈稀缺多多一從寄茲蹤表表無晦蝕光彩雖暫埋體素多不易神物豈終潛早晚照九域

黃幹

字直卿福州閩縣人嘗往見清江劉清之期以遠到因命受學於朱熹熹語人曰直卿志堅思苦與之處甚為有益病革以所著書授之曰吾道之託在此吾無憾矣寧宗朝補將仕郎知漢陽軍主管武夷冲佑觀起知安慶府有異績詳府志中除大理不拜歸里聚徒講學一如熹時卒贈朝奉郎謚肅文

答曾伯玉借長編

白露下百草迅商薄脩林幽人起長歎感此節物深攬衣自徘徊撫劍還悲吟丈夫各有志莫作兒女心涉遠當疾趨畏影須就陰願言理輕車去上南山岑

九日早發桃枝嶺

登山豈不樂況此風露清排簷夜雨滴詰旦天空明歡
然金石交要我林泉盟支筇越汗漫勇往不計程一水
何縈紆千峰鬱崢嶸仰視流雲馳俯聽幽壑鳴班荆得
所適斗酒聊共傾人生會有累聚散如浮萍今晨諧勝
遊異日難忘情意愜各賦詩庶以紀此行

道間觀瀑布

行行益以遠愜此心期幽一徑險復夷千林密相樛回

首天際山矗面縣飛流銀潢倚石壁玉龍下山湫光搖
日璀璨勢激風颼颼可望不可親神往形獨留眷言桃
枝山久懷卜築謀豈無一日閒努力窮冥搜

侍文公飲浮翠用劉叔通韻

涼風振幽壑陰雲翳前山高懷勵清秋適意林莽間煙
橫萬家井水淨雙溪灣徙倚暮忘歸人境相與閒遊子
獨何為千里方言還陪此杖屨遊忘彼道路艱心期更
他歲依巖結柴關

讒人

監謗兆周蹙偶語擠秦亡古風下刺上國步安且彊靖
康發深痛熙豐啟餘殃惜哉天子明未免讒者傷讒者
亦何為君子名愈彰

拜文公先生墓下

瞑投大林谷晨登率如亭高墳鬱嵯峨百拜雙淚零白
楊自蕭蕭宿草何青青悲風振林薄猿鳥為悲鳴音容
久寂寞欲語誰為聽空使千載後儒生抱遺經

與胡伯履

白露下百草玄雲翳崇岡遊子暮何之
條若孤雁翔朝發長沙渚夕息湘山陽
飛鳴念儔侶慷慨增悲傷故人懷我深
遠寄金玉章開緘且疾讀慰此饑渴腸
是時屈中火朔風掃枯黃歲月能幾何
皋蘭結微霜脂車策良馬日暮道正長
徒僕審驅馳前途畏榛荒劣質苦難任
白雲懷故鄉南山一舍隔矯首空西望

送章元德司理罷官歸永嘉

送君北門坂遙望東甌路峨峨白鶴嶺渺渺飛鸞渡上
有虎豹嗥下有蛟龍怒車馬堅且良維櫟夙已具褰裳
涉其險萬怪不足懼世路劇羊腸皦皦誠易汙但能心
無愧窮達安所遇毋為婉孌者暫蹶輒驚顧生平麋鹿
姿處世歎多忤胡為展良覲握手便如故高懷發鍼石
正論諧韶濩情親復告別欲語誰與晤乾坤一逆旅日
月雙脫兔寒儒守蓬蓽白首困章句期君以遠大庶足
慰遲暮

十二日復歸桃枝嶺

大溪章溪溪水清上寮下寮山路平三山屹立相犄角
百里連亘如長城仰干雲霄不盈尺俯視天高浮寸碧
閒雲吞吐溢澗谷飛泉噴灑下石壁中有一山名芙蓉
端冕正色羣山空望之令人起敬悚僧言直與衡嶽同
坡陀突兀作雲洞虎豹蹲踞棲鸞鳳聞道前朝開闢日
曾住浮屠幾千衆我來已作五日行皇天一雨復一晴
穹林杳靄非人世手接羣仙朝玉京曉來更向山前去

忽到山翁棲隱處却憶桃源洞裏人日出煙銷忘舊路
遊靈洞巖歌

深巖突兀山之阿足履危磴攀藤羅巖下清泉響環珮
巖前古木交枝柯當中洞門忽開豁上有石屋高嵯峨
乾坤開闢蘊奇特鬼神守護仍揮呵重門黯淡不可入
以火來照所見多出門小洞亦奇絕神龍奮怒吞蛟鼉
勝景如此難可得手倚石壁頻摩抄安有雄思如縣河
千言落筆仍高歌

訪高僉判所居

遠樹分高下，平洲半有無。
短亭低密竹，小艇隱寒蘆。
轉浪魚深入，斜陽鴉亂呼。
自慙貴公子，未老賦歸歎。

甲子語溪閔雨二首

塘中龍骨高數層，龜坼田中縱復橫。
青蓑若笠倚車卧，但有空車無水聲。

牛女盈盈河漢旁，清風肅肅吹羅裳。
朱門達旦聽歌曲，莫遣濃陰蔽夜光。

王阮

字南卿江州人其父祖三世皆有功於神宗朝阮少好學尚氣節自稱將種辭辯奮發嘗謁袁州守張栻栻導之見朱熹於武夷熹與語大悅之登隆興元年進士時孝宗初即位有恢復之志阮對策詳盡深切事勢知貢舉范成大歎曰是人傑也濠南康都昌主簿以廉聞移永州教授紹熙中知濠州改知撫州韓侂胄聞其名遣密客用美官誘出門下阮不答侂胄大怒批旨予祠阮歸隱廬山以終

題嚴陵釣臺并序

題釣臺多矣大槩高之爾未有明其意者也光武既

定天下深懲王氏之禍原于張禹孔光之流故昔之
所謂坐論者一切吏之時或叱咤侯霸等俛首而已
先生道高千古豈能堪此雖以禮聘不以禮答項枕
卧語又從而躋踐之使知己之不足驕士必不少留
古語云使騏驎可係而羈兮豈云異夫犬羊此則先
生之志也其首陽之流乎為賦小詩以發千載一笑
西都庸庸生禍胎東都切切繩公台平生故人苦畏辱
坐定白雲那肯來沈幾深略滿帝腹且憩先生一雙足

使知天上麒麟兒不似犬羊甘荼畜渭濱老叟不自持
為人人以鷹名之豈識桐江一竿竹依舊秋風魚正肥
古來賢者亦避世往往適逢天地閉得如建武亦不惡
又值首陽難降志山木陰陰江面寒此天別在壺中寬
幾曾流出桃花去寶氣自駭人間觀當時不願世知己
稱到于今却如此塞馬得失天好還千駟齊侯不窮理

題高遠亭

小攜樽酒作清遊行到方壺最上頭山在斷霞明處碧

水從白鳥去邊流苦無妙句窺天巧賴有名亭慰客愁
從此江南添勝景未應獨數庾公樓

龍塘久別乘月再到奉呈同社

龍塘疇昔擅雲烟破月重來倍爽然浮玉北堂三萬頃
扁舟西子二千年青山識面爭迎櫂白鷺知心不避船
華髮脩脩更何往一茅終在此橋邊

輦仲至

東平人從
學呂東萊

夜雨曉起方覺

夜雨鳴簷送五更不驚高卧最多情
窗間細視花無恙
牆外隨聽屐有聲
數把柔絲堤柳嫩
一奩方鏡閨波清
出門眼界殊明潔
但覺春寒處處生

離建

旅中多得早朝晴
野潤衣襟苦未清
時時數點雨猶落
隱隱一聲雷不驚
山入夏來差覺老
花從春去久無情
長汀又涉來時路
麥隴桑村小問程

韓元吉

字無咎官龍圖閣學士先穎川人徙居上饒所居之前有澗水故號南澗涉澗而南有園亭號蒼筤元吉與張南軒同以任子入西掖蓋孝宗時人於東萊放翁皆有投贈之什

紅梅

不隨羣艷競年芳獨自施
朱對雪霜越女謾誇天下白
壽陽還作醉時粧半依脩竹
餘真態錯認天桃有暗香
月底瑤臺清夢到霓裳
新換舞衣長

送陸務觀得倅鎮江還越

高文不試紫雲樓，猶得聲名動九州。
金馬漸登難避世，蓬萊已近却回舟。
燒城赤舌知何事，許國丹心惜未酬。
歸卧鏡湖聊洗眼，雨餘層壑正奔流。

雨中聞伯恭至湖上

莫嫌鞭馬踏春泥，茶鼎詩囊偶共攜。
山色雨深看更好，湖光煙接望還迷。
連天花絮飛將盡，夾道蒲荷長欲齊。
官事得閒須洗眼，蓬壺只在帝城西。

韓琥

南澗
之子

夏日

片月生林白沿流澗亦明幽人方獨夜山寺有微行野
處偏宜夏貧家不厭晴熏風吹老鬢腐草見飛螢

秋懷
四首

地僻稀人跡重林目自虛鳥飛晨氣外蟬噪晚涼初餘
潤從侵屨浮埃倦整書樵漁時上下閉戶又何居

木末芙蓉起亭亭綠且青牆猶承片瓦窗不礙疎櫺次

第花擎葢縱橫葉展屏石丁誰王者仙豈待沈冥

擁砌叢生菊何關老意多澆花驚易燥耘草喜成科枕
腊猶宜睡餐香豈待哦淵明藏不盡滿把尚婆娑

秋聲連夜起秋意雨來時睡覺風生屋涼須水到池交
遊稀自好出入懶方宜只被章泉誤書題又寄詩

十三日

南山春雪未全消路竝浮梁步石橋深綠漸歸高柳葉
淺紅初上小梅梢悄寒寺院鐘聲起昏暮人家燭影搖

一夜東風吹酒醒夢回花月是元宵


晚春

幽砌疎畦送晚春水流山靜見閒身行吟散去風光好
熟睡醒來雨氣新木筆豈非濃意態石楠終是淡精神
鶯聲圓處鶻聲急景物方知不負人

寒食

曉色猶籠淡淡煙花間行過小溪邊人家寒食當晴日
野老春遊近午天吹盡海棠無步障開成山柳有堆綿

呼兒覓友從鄰伴閒看村農又下田



宋元詩會卷四十

欽定四庫全書

集部

宋元詩會卷四十一

詳校官中書_臣陸湘

主事銜_臣徐以坤覆勘

總校官知縣_臣繆琪

校對官中書_臣牛稔文

謄錄監生_臣黃鑫

欽定四庫全書

宋元詩會卷四十一

兵部主事陳焯編

張栻

字敬夫丞相浚子也穎悟夙成師胡宏一見即告以孔門論仁之旨栻退而思若有得焉益自奮厲作希顏錄初以廕補官除直祕閣孝宗新即位浚起謫籍開府治戎栻間以軍事入奏因有所啟沃孝宗異其言遂定君臣之契浚去位湯思退用事逆罷兵講和栻營葬甫畢即拜疏力言譬不可忘當以自強為務時宰相虞允文自任恢拓然所求者非其道栻亦不與苟同每奏事上前直抒已見

多宰相所難堪者以是屢進輒退家居日久孝宗
念之起知靜江府安撫廣南西路諸蠻悅服尋除
秘閣修撰荆湖北路轉運副使因劾信陽守劉大
辨不報求去詔提舉武夷山沖佑觀卒年四十八

遊靜福山

朔風天外來寒色方嚴冽駕言道山遊蒼松挺勁節羣
鴉競鳴噪亂啄青山雪羽衣去千年高峰掛霜月

送朱元晦

君侯起南服意氣凌九州聿登文石陛忠言動宸旒坐
令聲利場縮頸仍包羞卻來卧衡門無媿自日休盡收

湖海意仰希洙泗遊不遠關山阻為我再月留遺經得
紬繹心事兩綢繆惟茲斷金友出處寧殊謀南山對牀
話匪為林壑幽白雲政在望歸袂風颼颼朝來出別語
已抱離索憂

灘山

灘江即湘江濺濺清見石其東列羣峰秋水碧復碧日
出霧露收草徑上逼側憑欄舒望眼已足慰疇昔更窺
岩穴勝創見為驚惕如何數里間奇觀屢接跡寬同厦

屋深劃若巨靈擘日月遞光景風雲變朝夕石橋幾年
成乳竇一時滴神龍舊隱處仰視多辟易蛻跡凜猶存
隱隱印霜脊下有澄湫溪餘波漱蒼壁往者已仙去來
者此其宅薄晚叩松關風過聲索索聊麾車騎退容我
且散策卻望訾家洲輕舫渡前磧回首烟樹林已復挂
蟾魄宇曠淨餘滓羣物被光澤河洲寄遐思空岩皎虛
白清輝猶可窺水色相激射天邊與川上亭亭如合璧
居然廣寒遊不用假六翮

嶽麓書院

遊觀不作難呼舟渡清泚新晴宿潦淨羣山政如洗上
方凭危欄萬象見根柢寒泉自可斟况復雜肴醴高談
下夕陽邂逅玄鑰啟中流發浩歌月色在波底

送楊廷秀

平生風雨夕每念名節難窮冬百草歇手自種瑯玕吾
子三十策字字起三歎豈欲求人知正自方寸殫請哦
碩人詩匪為樂考槃

題城南書院招元晦

積雨欣始霽清和在此時
林葉既敷榮禽聲亦融怡
鳴泉永不窮湖風起淪漪
西山卷餘雲逾覺秀色滋
層林叢綠間愛彼松栢姿
育青初不改似與幽人期

仲春過陽江亭子

亭古危臨岸林幽巧近城
烟容隨雨住花片著溪清
春事已如許客懷隨與傾
亭前幾株樹滿意欲敷榮

九日與賓佐登龍山

曉風獵獵笛橫秋澤國山河九日遊萬里煙雲歸老眼
千年形勢接中州丘原到處堪懷古萸菊隨時豈解愁
此日此心誰共領朝宗江漢自東流

落梅

清溪雨過小橋東落月紛紛水映紅五夜客愁花片裏
一年春事角聲中歌殘玉樹人何在舞破香衫曲未終
卻憶孤山醉歸路馬蹄殘雪襯東風

此首已入三十
八卷尤表詩而

南軒集中復見之必
有一誤姑按再考

蘇雲卿

附

廣漢人少與張浚為布衣交浚以管樂期之紹興間來豫章東湖結廬獨居浚為相馳書函幣屬豫章帥漕親造其廬期以必致雲卿即日避去題詩于壁莫知所之

還張德遠書幣題詩蔬圃壁間

多年別作一番風誰料聲名達帝聰自有時人求富貴

莫將富貴汙

去聲

蘇公

楊萬里

字廷秀吉州吉水人紹興甲戌進士調永州零陵丞時張浚謫永杜門謝客萬里以書力請始得見

浚勉以誠正之學因服教終身題其室曰誠齋丁
父憂服闋知奉新縣用大臣薦召為國子博士歷
吏部郎官將作少監出知漳州常州尋提舉廣東
茶鹽有平盜功孝宗稱之曰仁者之勇就除提點
刑獄以憂去免喪召為尚左郎官淳熙十二年地
震上封事萬言最為切直以爭張浚配享忤旨出
知筠州光宗即位以祕監召再出轉運江東朝議
欲用鐵錢萬里力疏其不便失宰相意改知贛州
不赴予祠自是不復出矣寧宗嗣位召赴行在引
年乞休嘉泰四年升寶謨閣學士卒年八十三諡
文節子
長孺

新秋晚酌

匡牀東鄉坐秋風忽淒其老夫衰病骨急令閉東扉西

扉亦半掩壓風作東吹何必風及我風入涼自馳晚蟬
是誰說我飲渠便知飛從何方來徑集庭樹枝三歎復
九詠話盡新秋悲我老悲已忘汝語復為誰老烏啼一
聲不知蟬所之

蘇木灘

灘雪清濺眸灘雷怒醒耳落洪翠壁立跳波碧山起船
進若戰勝船退亦遊戲若非篙師苦進退皆可喜忽逢
下灘舟掀舞快雲駛何曾費一楫纔瞬已數里會有上

灘時得意君勿恃

聞一二故人相繼而逝感歎書懷

故人昔同朝與遊每甚歡豈緣勢利合相得文字間有
頃各補外不見今六年我來荆溪上敲榜索租錢故人
復雙入飛上青雲端我雖世味澹羨心能忽然忽傳故
人去得書墨未乾又傳故人亡驚悼摧肺肝鼎貴良獨
佳安貧未遽賢向以我易彼安知不作難今以彼易我
試問誰當慳如何捐此軀必要博好官顧謂妻與子官

滿當歸曰我賤汝勿羞我貧汝勿歎從汝丐我身百年
庶團樂妻子笑答我脩短未易言富貴必速殞郭令當
天殘貧賤果永算顏子壽必延我復答渠道薄命我自
憐我福肯如郭我德敢望顏造物本嗇與我乃多取旃
借令彼不怒退者我獨安汝言自有理我意不可還

暮宿半塗

朝日在我東夕日在我西我行日亦行日歸我未歸勢
須就人宿遠近或難期平生太疎放似黠亦似癡如何

今日行不以衾枕隨幸逢春小暄倒睡莫解衣借令今夕寒我醉亦不知

次日醉歸

日晚頗欲歸主人苦見留我非不能飲老病怯觥籌人意不可違欲去且復休我醉彼自止醉亦何足愁歸路意昏昏落日在嶺陬竹裏有人家欲憩聊一投有叟喜我至呼我為君侯告以我非是俛笑仍掉頭機心久已盡猶有不下鷗田父亦外我我老誰與遊

跋馬公弼省幹出示山谷草聖浣花醉圖

名彥輔西人

涪翁浣花醉圖歌歌詞自作復自寫少陵無人張顛死
以翁奄有二子者不論釵股與錐沙更數旱蛟及驚蛇
詩仙不合無草聖鬼怒天嗔教薄命人言愛書緣愛賢
紫眉未必勝青編舊時鬼門關外客如今一字抵尺璧
何須千載空相憶

送王監簿民瞻南歸

鹿珪

潮頭打雲雲不留月波潑窗窗欲流夜寒報晴豈待曉

天公端為盧溪老盧溪在山不知年盧溪出山即日還
黃紙苦催得高卧青霞成癖誰能那詔謂先生式國人
掉頭已復煙林深路傍莫作兩疏看老儒不用橐中金

題嚴州新堂

郡圃舊亭面東了無所見太守曹仲本撤材易地為
堂貿地以廣之正對南山經始小築覺江山輻湊因
得長句

新堂略有次第否忙裏從公一來觀是時新秋收舊雨

小風吹花掠巾屨江山只道不解語云何惠然堂上聚
北山故挽南山住東溪不遣西溪去向來天藏在何處
遭公拈出天不拒舊亭不為作山主背山起樓何以故
更煩好手鏤東臯放出釣臺寸來許

謝唐德明惠筍

高人愛筍如愛玉忍口不餐要添竹云何又遣十輩來
昏花兩眼為渠開販夫束縛向市賣外強中乾美安在
錦紋猶帶落花泥不論燒煮兩皆奇猪肝累人真可忤

以筍累公端不惡

上元夜里俗粉米為繭絲書吉語置其中以占一
歲之禍福謂之繭卜因戲作長句

去年上元客三衢衝雨看燈強作娛今年上元家裏住
村落無燈惟有雨隔溪叢祠稍簫鼓不知還有遊人否
兒女炊玉作繭絲中藏吉語默有祈小兒祝身取官早
小女只求蠶事好先生平生笑兒癡逢場亦復作兒戲
不願著腳金華殿不願增巢上林苑只哦少陵七字詩

但得長年飽喫飯心知繭卜未必然醉中得卜喜欲顛
釣雪舟中霜夜望月

溪邊小立苦待月月知人意偏遲出歸來閉戶悶不看
忽然飛上千峰端卻登釣雪聊一望冰輪正挂松柯上
詩人愛月愛中秋有人問儂儂掉頭一年月色只臘裏
雪汁揩磨霜水洗八荒萬里一青天碧潭浮出白玉盤
更約梅花作渠伴中秋可是欠此段

雪夜尋梅

去年看梅南溪北月作主人梅作客今年看梅荆溪西
玉為風骨雪為衣臘前欲雪竟未雪梅花不慣人間熱
橫枝憔悴浣晴埃端令羞面不肖開縞袞夜訴玉皇殿
乞得天花來作伴三更滕六駕海神先遣東風吹玉塵
梅仙曉沐銀浦水冰膚別放瑤林春詩人莫作雪前看
雪後精神添一半

過雲川大溪

菰蒲際天青無邊只堪蓮蕩不堪田中有一溪元不遠

摺作三百六十灣政如綠錦地衣上玉龍盤屈於其間
前船未轉後船隔前灣望得到不得及至前灣到得時
只與後灣纔咫尺朝來已度數百縈問知德清猶半程
老夫乍喜樵夫悶管有到時君莫問

插秧歌

田夫拋秧田婦接小兒拔秧大兒插笠是兜鍪蓑是甲
雨從頭上溼到脚喚渠朝餐歇半霎低頭折腰只不答
秧根未牢蔣未匝照管鵝兒與雛鴨

題望韶亭

新隆寺後看韶石三三兩兩各依稀
金坑津頭看韶石
十十五五不整齊
一來望韶亭上看九韶八音堆一案
金鐘大鏞浮水涯
玉瑟瑤琴倚天半
堯時文物也麓疎
禮樂猶帶鴻荒餘
茅茨殿上搥土鼓
葦簫聲外無笙竽
黃能郎君走川嶽
領取后夔搜禮樂
嶧山桐樹半夜鳴
泗水石頭清晝躍
山祇川后爭獻珍
姚家制作初一新
帝思南嶽來時巡
宮琛廟寶皆駿奔
曲江清澈碧瓊輦

海山孤尖翠屏展天顏有喜后夔知一奏雲韶供亞飯
帝登九嶷忘卻歸不知斑盡湘笛枝后夔一脰跛莫隨
坐委衆樂江之湄儀鳳舞獸掃無迹獨留一狻守其側
至今喚作獅子石雨淋日炙爛不得洞庭張樂已莓苔
健為獲磬亦塵埃不如九韶故無恙戛擊尚可冬起雷
何時九秋霜月裏來聽湘妃瑟聲美曲終道是不見人
江上數峰是誰子

正月十二日遊東坡白鶴峰故居其北思無邪齋

真蹟猶存

詩人自古例遷謫蘇李夜郎并惠州人言造物因嘲弄
故遣各捉一處囚不知天公愛佳句曲與詩人為地頭
詩人眼底高四海萬象不足供詩愁帝將湖海賜湯沐
僅僅可以當冥搜卻令玉堂揮翰手為提椽筆判羅浮
羅浮山色濃潑黛豐湖水光先得秋東坡日與羣仙遊
朝發崑閬夕不周雲冠霞佩照宇宙金章玉句鳴天球
但登詩壇將騷雅底用蟻穴封王侯元符諸賢下石者

祇於千載掩鼻羞我來剝啄王粲宅鶴峰無恙江空流
安知先生百歲後不來弄月白蘋州無人挽住乞一句
猶道雪乳冰湍不當年醉裏題壁處六丁已遣雷電收
獨遺無邪四箇字鸞飄鳳泊蟠銀鈎如今亦無合江樓
嘉祐破寺風颼颼

題南海東廟

羅浮山如萬石鍾一股南走如渴龍雷奔電激遮不住
直抵海濱無去處低頭飲海吐絳霞舉頭對著祝融家

珠宮玉室水晶殿萬水一日朝再銜青山四圍作城郭
海濤半浸青山腳客來莫上浴日亭亭上見海君始驚
青山缺處如玉玦潮頭飛來打雙闕晴天無雲濺碎雪
天下都無此奇絕大海更在小海東西廟不如東廟雄
南來若不到東廟西京未覩建章宮海神喜我著綺語
為我改容收霧雨乾坤軒豁未能許小試日光穿漏句
羅仲憲送焯菜謝以長句

學琴自有譜相鶴自有經蔬經我繙盡不見焯菜名金

華詩裏初相識玉友尊前每相憶坐令芥孫薑子茅一
見風流俱避席取士取名多失真向來許靖亦誤人君
不見鄭花不得半山句卻參魯直稱門生

謝胡子遠郎中惠蒲大韶墨報以龍涎心字香

墨家者流老蒲仙碧梧採花和麝煙華陽黑水煎膠漆
大陰玄霜作肌骨龍尾磨汁飲鼠鬚落點髹几几不如
夷甫清瞳光敵日一見墨卿驚自失後來夔州有梁杲
爾來黔川有吳老亦追時好得時名竟為蒲生豎降旌

吳墨往往玄尚白梁墨溼溼黼黏壁南宮先生來自西
惠然贈我四玄圭我無鵲返鸞回字我無金章玉句子
得君此贈端何似兀者得韞僧得髭安得玉案雙鳴璫
金刀繡段底物償送以龍涎心字香為君興雲繞明窗

李聖俞郎中求吾家江西黃雀醪法戲作醪經遣
之

江夏無雙小道士一丘一壑長避世栽雲縫霧作羽衣
蘆花柳綿當裘袂身騎鴻鵠太液池腳踏金螭攀桂枝

渴飲南陽菊潭水飢啄藍田粟玉芝今年天田秋大熟
紫皇遣刈神倉穀一雙鳧舄隨雲羅夜隨弋人臥茅屋
賣身不直程將軍卻與彭越俱策勲解衣戲入玉壺底
壺中別是一乾坤水精鹽山兩岐麥身在椒蘭衆香國
玉條脫下澡凝脂金叵羅中酌瓊液平生學仙不學禪
剗心洗髓糟牀邊諸公俎豆驚四筵猶得留侯借箸前
昔為飛仙今酒仙更入太史滑稽篇

跋尤延之左司所藏光堯御書歌

光堯太上皇帝御書西漢書列傳目上有璽文曰帝
錄臣表得之以示臣萬里謹拜手稽首作歌敬書于
後

鸞臺長史老野僧月前病鶴霜後蠅文書海裏袞不了
黑花亂發雙眼睛故人同舍尤太史敲門未揖心先喜
袖中傾下十斛珠五色光芒射牕几自言天風來帝旁
拾得復古殿中雲一張向來太上坐朝罷勝日光風花
柳暇浣花叢裏冰雪容宣城鷄距針芒鋒天顏有喜聊

小試西京書目供遊戲韓彭衛霍欣挂名舒向卿雲感
書字漢廷多少失意人九京寸恨不作塵一朝翻入聖
筆底昭回之光喚渠起小臣濫巾縫掖行手抄孝經不
徹章何曾下筆寫史漢再拜恭覽汗透裳太史結廬伴
鷗鷺錫山山下荆溪渡紅光紫炁燭天衢箇是深藏寶
書處

行路難

君不見河陽花今如泥土昔如霞君不見武昌柳春作

金絲秋作帚人生馬耳射東風柳色桃花卻長久秦時
東陵千戶侯華蟲被體腰蒼瑯漢初沛邑刀筆吏折腰
如磬頭搶地蕭相厥初謁邵平中庭百拜百不應邵平
後來謁蕭相故侯一拜一惆悵萬事反覆何所無二子
豈是大丈夫窮通流坎皆偶爾搏扶未必賢搶榆華胥
別是一天地醉鄉何曾有生死儂欲與君歸去來千愁
萬恨付一杯

送姜夔堯章謁石湖先生

釣璫英氣橫白蜺歎唾珠玉皆新詩江山愁訴鴛為泣
鬼神露索天洩機彭蠡波心弄明月詩星入腸肺肝裂
吐作春風百種花吹散瀕湖數峰雪青鞋布襪輒紅塵
千詩只博一字貧吾友夷陵蕭太守逢人說項不離口
袖詩束來謁老夫慙無高價當璠璣翻然卻買松江艇
徑去蘇州參石湖

謝王恭父贈梁杲墨

君不見蜀人文字天下工前有相如後揚雄君不見蜀

人烏九天下妙前有蒲韶後梁杲初得梁墨竊模糊老
夫道梁不及蒲蓬山藏室王校書笑我未識真玄菟兩
圭水蒼筤雙團點漆壁一併贈老夫此意已金石洮州
綠玉試松花星潭黑雲走風沙龍蛇起陸鷹入骨卻愁
雷電奪神物

再賦石翁石婆

石翁誰怒猶睥目石婆多愁鬢先禿荒山野水四無人
二老對立今幾春珠襦玉匣化為土金雁銀鳧亦飛去

知是六朝何帝陵
摩挲碧蘚俱無語

贈寫真水鑑處士王溫叔

我不如森森千丈松
我不如濯濯春月柳
髯疎鬢禿已
雪霜皮皺肉皺真老醜
葉生畫時顏尚朱
王生畫時骨
更臞
一生愛山吟不就
兩肩化作秋山瘦
君不見褒公
鄂公圖凌煙腰間羽箭大如椽
君不見浣花醉圖粉墨
落日斜泥滑驢失腳貴人寒
士兩相嗤畫圖猶在人已
非王生王生且停手
不如生前一杯酒

嘲道翁楓松相倚

雙楓一松相後前可憐老翁依少年少年翡翠新衫子
老翁淡衣青布被更看秋風清露時少年再換輕紅衣
莫教一夜霜雪落少年赤立無衣著老翁淡衣卻不惡
臘夜普明寺睡覺

作臘聊春酒依人只短檠略無更可數聽到雨無聲犬
吠知何苦鷄寒肯更鳴生來眠不足老去夢難成

和仲良春晚即事

筍改齋前路蔬眠雨後畦晴江明處動遠樹看來齊我
語真彫朽君詩妙斲泥殷勤報春去恰恰一鶯啼

泊樟頭

此地三接浙從來四肅霜日斜秋樹轉市散暮船忙波
捲青中白霞翻紫外黃汀沙渾換卻不記舊圓方

理蔬

小摘吾猶惜頻來逕自成青蟲捕仍有蠹葉病還生貧
裏猶存甯霜餘正可羹窺園未妨學抱甕更須營

之永和小憩資壽寺

石子密鋪徑竹莖疎作行不緣憩騶僕幾失此山房佛
像看都好林花靜自香來須清興盡歸更借僧牀

白沙買船晚至嚴州

重霧凝朝雨斜陽竟晚晴萬山江外盡一埭嶺尖明身
小寧嫌窄途長已倦行子陵臺下水未酌意先清

涉水溪宿淡山

徑仄愁斜步溪深怯正看破船能不渡晴色敢辭寒白

退山雲細青還玉宇寬險艱明已濟魂夢未渠安

夜坐

欲雪天還惜不風寒自生燈搖無定影火作始然聲又
遣庭闈訊縣知骨肉情履端猶幾日有夢未歸程

立春前一夕

臘盡春還未朝暄暮復寒雨晴終日異衣著一冬難生
菜知無分殘梅不用看本憑書遣睡轉使睡相干

午憩東塘近白干江西地盡於此

日以秋還短塗緣熟故長也知茅店窄奈此竹風涼更
遠終然到而吾有底忙欲行猶小駐咫尺使它鄉

秋夜讀書

穉子慵都睡先生喚不應蟲聲窗外月書冊夜淡燈半
醉聊今古千年幾廢興有懷人未會不樂我何曾

送葉叔羽寺丞持節淮東

煮海誰為崇沿淮困不勝民思賢使者帝遣大農丞玉
節寒侵斗牙檣凍作冰來歸輦早著紫禁要渠登

別蕭挺之泉州

八葉今成九一枝誰敢雙野人應補外賢者亦為邦
夾岸梅臨水孤帆雪湧江別愁纔半掬不遣我心降

池亭

小沼纔堦下孤亭恰水邊揩磨一玉鏡上下兩青天可
惜無多水難堪著釣船今年非不暑每到輒醒然

從范至能叅政遊石湖精舍坐間走筆

震澤分波入垂虹隔水看何須小風起生怕牡丹寒政

坐諸峰好端令落筆難催人理歸櫂落日許無端

四月四日午初出浙東界入信州永豐

外面千峰合中間一徑通日光自搖水天靜本無風村
酒渟春綠林花倦午紅莫欺山堠子知我入江東

曉晴過猿藤逕

厭雨欣初霽貪程敢晏眠排天雙壁起受日一峰先入
逕惟逢樹無人况有煙藤深猿不見聲到客愁邊

羅溪道中

每歲秋猶熱今年閏故涼松稀青有數山遠碧無常陣
陣金風細家家玉粒香祇言官路短堠子暗添長

宿蘭溪水驛前

繫纜蘭溪岸開襟柳驛窗人爭趨夜市月自落秋江燈
火疎還密帆檣隻更雙平生經此縣今夕駐孤幢

發揚港渡入交石夾

朝雨息息霽春山歷歷嘉老青交幼綠暗錦出明花漁
艇十數隻鷄聲三五家人生須富貴此輩亦生涯

蚤起稜鎮

人趁村中樹鷄鳴擔上籠忽看一天紫未吐半輪紅誰
撼扶桑露吹來楊柳風詩肩忍涼冷已出兩臞峰

見澹菴胡先生舍人

澹翁家近醉翁家二老風流莫等差黃帽朱耶飽煙雨
白頭紫禁判鶯花補天老手何須石行地新堤早著沙
三歲別公千里見端能解榻淪春芽

和馬公弼雪

灑竹穿梅湖更山客間得此未嫌寒髯疎也被輕輕點
齒冷猶禁細細餐晴了還成三日凍消餘畱得半庭看
憑誰說似王郎婦鹽絮吟來總未安

賀澹菴先生胡侍郎新居落成

眼高不肯住清都夢繞江南水竹居卻入青原更青處
飽看黃本硬黃書剪裁風月聊堪醉拆洗乾坤正要渠
賜宅不應公得免未知此第似林廬

霰

雪花遣霰作前鋒勢頗張皇欲暗空
篩瓦巧尋疎處漏跳堦誤到暖邊融
寒聲帶雨山難白冷氣侵人火失紅
方訝一冬暄較甚今宵敢歎臥如弓

中秋前兩日別劉彥純彭仲壯於白馬山下

惓惓離合夢非夢續續談諧眠不眠
莫道對牀容易著試思分手幾何年
長亭更放金荷淺後夜誰同璧月圓
要得長隨二三友不知由我定由天

答漢章直

詩人今代謝宣城舉子新年章子平雨剩風殘忽春暮
花催草喚又詩成五湖煙水三冬臥萬里雲霄一日程
老裏睡多吟裏少舊家句熟近來生

秋懷

隨分哦詩足散愁老懷何用更冥搜聿來胥宇蟻移穴
無以為家燕入秋蓋世功名吹劒首平生憂患漸矛頭
從今歸去便歸去未到無顏見白鷗

以糟蟹洞庭柑送丁端叔有詩因和其韻

斗州只解寄鵝毛鼎肉何曾饋百牢驅使木奴供露顆
催科郭索獻霜螯鄉封萬戶只名醉天作一丘都是糟
卻被新詩太清絕喚將雪虐更風饕

十二月廿一日迎春

星淡孤螢月一梳迎春早起正愁予土牛只解催人老
春氣自來何事渠官柳野梅殘雪後金幡玉勝曉光初
卻思歸跨春山犢繭栗仍將挂漢書

上元前大雪即晴

臘前三白已奇絕年後六花仍作團纔定忽斜偏有思
欲消還凍不勝寒且留大地萬銀屋要伴青天孤玉盤
今歲上元君記取紅燈白月雪中看

寓倅廳寒夜不寐

不堪斜雨打虛窗只願晴陽送曉光自是老人眠不著
近來春夜幾曾長樓頭吹動梅花曲夢裏猶疑燕寢香
道是官居如客舍等閒一宿兩年強

昨日訪子上不遇裴回庭砌觀木犀而歸再以七

言乞數枝

昨攜兒輩叩雲關繞遍巖花恣意看苔砌落溪金布地
水沈蒸透栗堆盤寄詩北院賒秋色供我西窗當晚餐
小朶出叢須折卻莫教折破碧團圞

題南雄驛外計堂

攜家度嶺夜乘槎小泊淩江水北涯二月山城無菜把
一年春事又楊花舉頭海國星辰近回顧梅山草樹遮
客子相逢聞好語看山只欠到南華

三月一日過摩舍那灘阻雨泊清溪鎮

一聲霹靂霽光收
急泊荒茆野渡頭
摩舍那灘衝石過
曼陀羅影漾江流
山纔入眼雲遮斷
船去追程雨見留
夜宿清溪望清遠
舉頭不見隔英州

春晴懷故園海棠

竹邊臺榭水邊亭
不要人隨只獨行
乍暖柳條無氣力
淡晴花影不分明
一番過雨來幽徑
無數新禽有喜聲
只欠翠紗紅映肉
兩年寒食負先生

初食筍蕨

魚鳳烹龍世浪傳，猩脣熊掌我無緣。
只逢筍蕨杯盤日，便是山林富貴天。
穉子玉膚新脫錦，小兒紫臂未開拳。
只嫌嶺外無珍饌，一味春蔬不直錢。

南海東廟浴日亭

南海端為四海魁，扶桑絕境信奇哉。
日從若木梢頭轉，潮到占城國裏回。
最愛五更紅浪沸，忽吹萬里紫霞開。
天公管領詩人眼，銀漢星槎借一來。

冬至節後賀皇太子及平陽郡主

長樂鐘聲遶夢驚，建章星影照人行。
千官燈語聽殘點，一夜霜寒在五更。
金鑰玉符開北闕，銀鞍絲控謁東明。
青宮朱戟環天極，五色祥雲覆帝城。

謝張功父送牡丹

病眼看詩痛不勝，落花千朵喚雙明。
淺紅濃紫各新樣，雪白鵝黃非舊名。
擡舉精神微雨過，留連消息嫩寒生。
蠟封水養松窗底，未似瑤欄倚半醒。

沈虞卿祕監招遊西湖

蘇公堤遠柳生煙和靖園深竹映關
船入菱荷香處去
人從雲水國中還似寒如暖清和在
欲雨翻晴頃刻間
能為蓬萊老仙伯一杯痛快吸湖山

跋陸務觀劔南詩稿

今代詩人後陸雲天將詩本借詩人重尋予美行程舊
盡拾靈均怨句新鬼嘯猿啼巴峽雨花紅玉白劔南春
錦囊繙罷清風起吹仄西窗月半輪

送周元吉顯謨左司將漕湖北

又見周郎攜小喬武昌赤壁醉嬌嬈蜀江雪水來三峽
吳苑風煙訪六朝秋月春花出肝肺新詞麗曲入笙簫
歸來卻侍金鑾殿好看霜毫映珥貂

過平望

望中不著一山遮四顧平田接水涯柳樹行中分港汊
竹林多處聚人家風將春色歸沙草天放晴光入浪花
午睡起來情緒惡急呼蟹眼淪龍芽

送吳敏叔待制侍郎

腳踏鷄翹豹尾間心飛碧岫白雲端人看疏傳如圖畫
帝念嚴光返釣灘玉殿松班唐次對竹宮茅立漢祠官
自憐病鶴樊籠底方羨冥鴻片影寒

戊申四月九日得請補外初出國門宿釋迦寺

出卻金宮入梵宮翠微綠霧染衣濃三年不識西湖月
一夜初聞南澗鐘藏室蓬山真昨戲園翁溪友得今從
若非朝士相追送何處冥鴻更有蹤

明發南屏

新晴在在野花香
過雨迢迢沙路長
兩度立朝今結局
一生作客老還鄉
猶嫌數騎傳書札
剩喜千山入肺腸
到得前頭上船處
莫將白髮照滄浪

入玉山七里頭

諸村不雨數旬餘
此地瀕江萬寶蘇
晚紫豆花初總角
早黃稻穗已長須
回頭金步野蹊遠
當面玉山秋壙孤
偶見年時解船處
客愁依舊挂菰蒲

過弋陽觀競渡

急鼓繁鉦動地呼
碧琉璃上兩龍趨
一聲翻倒馮夷國
千載淒涼楚大夫
銀椀錦標誇勝捷
畫橈繡臂照江湖
三年端午真虛過
奇觀初逢慰道塗

宿放牛亭秦太師墳菴

函關只有一穰侯
瀛館寧無再帝丘
天極八重心未死
台星三點折方休
只看壁後新亭策
恐作移中屬國羞
今日牛羊上丘壠
不知丞相更嗔不

清明日午憩黃池鎮

莫笑孤村小市頭花邊人出浦邊遊
綠楊拂水雙浮鴨
碧草粘天一落鷗
嬾困風光酣午睡
陰沈天氣嫁春愁
阿誰道是清明節
我對清明喚作秋

明發黃土龕過高路

又過崢嶸兩峽間也無溪水也無田
嶺雲放腳寒垂地
山麥掀髯翠拂天
碧玉屏風吹不倒
青綾步帳買無錢
詩人富貴非人世
猶自淒涼意惘然

送丘宗卿帥蜀

諭蜀宣威百萬兵不須號令自精明
酒揮勃律天西枕鼓卧蓬婆雪外城
二月海棠傾國色五更杜宇說鄉情
少陵山谷千年恨不遇丘遲眼為青

發趙屯得風宿楊林池是日行二百里

動地風來覺地浮拍天浪起帶天流
舞翻柳樹知何喜拜殺蘆花未肯休
兩岸萬山如走馬一帆千里送歸舟
出籠病鶴孤飛後回首金籠始欲愁

登鳳凰臺

十年百尺鳳凰臺，送盡潮回鳳不回。
白鷺北頭江草合，烏衣西面杏花開。
龍蟠虎踞山川在，古往今來鼓角哀。
只有謫仙留句處，春風掌管拂蛛煤。

送簡壽王主簿之官臨桂

柴門草徑儘莓苔，不放黃塵俗子來。
詩客清晨衝雨入，梅花一夜為君開。
飄蕭落葉殘燈火，陸續清談濁酒杯。
二十一年纔四見，驪駒抵死又相催。

書黃廬陵伯庸詩卷

句法何曾問外人
單傳山谷當家春
截來雲錦花無樣
倒寫珠胎海亦貧
汗竹香中翻墨汁
扶桑梢上挂頭巾
詩名官職看雙好
向道儒冠不誤身

九日菊未花

舊說黃楊厄閏年
今年併厄菊花天
但按青蕊浮新酒
何必黃金鑄小錢
半醉嚼香霜月底
一枝卻老鬢絲邊
阿誰會得開遲意
暗展重陽十月前

春日 二首

江水夜韶樂海棠春貴妃殷勤向春道莫遣一花飛
日落碧簷外人行紅雨中幽人詩酒裏又是一春風

夏日追涼

夜熱依然午熱同開門小立月明中竹深樹密蟲鳴處
時有微涼不是風

書王右丞詩後

晚因子厚識淵明早學蘇州得右丞忽夢少陵談句法

勸叅庾信謁陰鏗

讀白元長慶二集詩

讀過元詩與白詩一生少傳重微之再三不曉渠何意
半是交情半是私

瓶中紅白二蓮

二首

紅白蓮花共玉瓶紅蓮韻絕白蓮清
空齋不是無秋暑
暑被花銷斷不生

白蓮半荅未開時看作紅蓮更不疑
到得欲開渾別了

玉膚洗退淡胭脂

上章戴灘

脫巾枕手仰哦詩
醉上諸灘總不知
回看他船上灘苦
方知他看我船時

三月二十七日送春絕句

只餘三日便清和
儘放春歸莫恨他
落盡千花飛盡絮
留春肯住欲如何

宿靈鷲禪寺

二首

暑中帶汗入山中霜滿風篁雪滿松只是山寒清到骨
也無霜雪也無風

初疑夜雨忽朝晴乃是山泉終夜鳴流到前溪無半語
在山做得許多聲

出永豐縣西石橋上聞子規

花愁月恨只長啼雨夕風晨不住飛自出錦江歸未得
至今猶勸別人歸

戲筆

野菊荒苔各鑄錢
金黃銅綠兩爭妍
天公支與窮詩客
只買清愁不買田

大雪中過言水小盤渡西歸

風捲寒江浪溼天
斜吹亂雪忽平船
碧琉璃上瓊花裏
獨載詩人孟浩然

題枕榔樹

化工到得巧窮時
東補西移也大奇
君看枕榔一窠子
竹身杏葉海棠枝

送德輪行者

瀝血抄經奈若何十年依舊一頭陀
袈裟未著愁多事著了袈裟事更多

過鳥石大小二浪灘俗呼為郎因戲作竹枝歌

小郎灘下大郎灘伯仲分司水府關
誰為行媒教作贅小姑山與大姑山

三月三日上忠襄墳因之行散絕句

三首

長干橋外即烏衣今著屠沽賣菜兒
晉殿吳宮猶碧草

王亭謝館儘黃鸝

遊人不是上墳回便是清湍禊事來
最苦相逢無處避
天禧寺及雨花臺

除卻鍾山與石城
六朝遺跡問難真
里名只道新名好
不道新名誤後人

過松源晨炊漆公店

莫言下嶺便無難
賺得行人錯喜歡
正入萬山圈子裏
一山放出一山攔

悶歌行

阻風泊湖心康郎山旁小舟三宿作悶歌行

風氣掀天浪打頭只須一笑不須愁
近看兩日遠三日
氣力窮時會自休

有歎

飽喜饑嗔笑殺儂鳳凰未可笑
狙公儘逃暮四朝三外
猶在桐花竹實中

八月十三日望月

纔近中秋月已清
鴉青幕挂一團冰
忽然覺得今宵月
元不粘天獨自行

初秋戲作俳體

二首

自曝羣書舊
間新淨指白醺
拂黃塵莫羞空腹
無丁字
且免秋陽晒殺人

獨對秋筠倒
晚壺喜無吏舍
四歌呼柳梢一
殼茲緇滓
屋角雙斑谷古孤

暮春

花時追賞夜將朝
花過遲眠日儘高
又與山禽爭口腹
執竿挾彈守櫻桃

木犀芙蓉盛開

先生深住萬山村
霧裏雲包不見痕
也被閒人知去處
芙蓉巷裏木犀門

楊長孺

字伯子誠齋先生子也清節高文趾美克肖嘉定
間為湖州守彈壓貴豪牧養小民治績冠于三輔
及帥番禺將受代有俸錢七千緡盡委以充下戶
租稅嘗言士大夫能清廉便是七分人了公忠仁

明皆從
此出

一滴泉

法眼三泓井曹溪一滴泉經秋杜宇血遺老徑山禪衲
子非常釋叢林別是天方諸多少淚分洒汝江邊

湖州民祠小像于學宮值有浙東庾節之除攜像
以行自題其上

面有憂民色天知報國心三年風月少兩鬢雪霜淡更
莫留形跡何曾廢古今不如隨我去相伴老山林

按
湖

學之祠楊伯子也與工部尚書戴少望並組豆馬楊羞
與戴伍故卷藏以行當時士子有戲和楊韻者末句云
可憐戴工部獨樹不成林

帥番禺秩滿別石門

石門得得泊歸舟江水依依別故侯擬把片香投贈汝

這回欲帶忘來休

晉吳隱之守五羊歸舟有香
一片投石門江中詩用此事

宋元詩會卷四十一